



CONVENIO DE COLABORACIÓN ENTRE A CONSELLERÍA DE POLÍTICA SOCIAL E A REDE EUROPEA CONTRA A POBREZA (EAPN-GALICIA) PARA O DESENVOLVEMENTO DE ACTUACIÓNS ENCAMIÑADAS Á COORDINACIÓN, OPTIMIZACIÓN DOS RECURSOS E SINERXIAS DE ACTUACIÓN DAS ENTIDADES INTEGRANTES QUE TEÑEN COMO FINALIDADE A LOITA CONTRA A POBREZA E A EXCLUSIÓN SOCIAL NO EXERCICIO 2020

Santiago de Compostela, 25 de setembro de 2020

REUNIDOS

Dunha parte:



Dona Fabiola García Martínez, conselleira de Política Social da Xunta de Galicia, nomeada polo Decreto 98/2018, do 26 setembro, actuando en nome e representación da consellería, no uso das facultades que lle veñen atribuídas no artigo 34 da Lei 1/1983, do 22 de febreiro, de normas reguladoras da Xunta e da súa presidencia; no Decreto 110/2020, do 6 de setembro, polo que se establece a estrutura orgánica da Xunta de Galicia, e no Decreto 176/2015, do 3 de decembro, polo que se establece a estrutura orgánica da Consellería de Política Social.

Doutra parte:

Dona Eloína Ingerto López, con DNI 33321904X, presidenta da asociación Rede Europea de Loita contra a Pobreza e Exclusión Social no Estado Español na Comunidade Autónoma de Galicia (en adiante EAPN-Galicia), con NIF G70209549, actuando en nome e representación dela, segundo o acordo de modificación da Xunta Directiva adoptado pola Asemblea Xeral de dita asociación o día 5 de xuño de 2019.

Ambas as dúas partes, no nome e representación no que concorren e coa capacidade legal suficiente para este acto.





MANIFESTAN

PRIMEIRO: Que EAPN-Galicia é unha entidade que agrupa a entidades autonómicas do terceiro sector implicadas na loita contra a pobreza e a exclusión a través da defensa dos dereitos das persoas en situación ou risco de pobreza e exclusión mediante a incidencia política e social. Atópase inscrita no Rexistro Único de Entidades Prestadoras de Servizos Sociais co número E-5769. Segundo os seus estatutos, carece de ánimo de lucro; conta con personalidade xurídica propia, autónoma das súas entidades asociadas, con plena capacidade para ser suxeito de dereitos e obrigas; o seu ámbito de actuación é principalmente a Comunidade Autónoma de Galicia, e ten como fins, entre outros, os seguintes:

- a) Facilitar os fluxos de información entre as organizacións do terceiro sector e contribuír á formación dos seus diversos axentes.
- b) Contribuír a analizar a realidade da pobreza e a exclusión social e reflexionar sobre as súas causas e sobre as propostas para a incidencia das mesmas, promovendo estudos e investigacións, así como xornadas, seminarios e foros de reflexión e análise.

Incidir nas políticas sociais desenvolvidas en Galicia, dende o ámbito europeo e estatal ata o local, con especial incidencia nas políticas deseñadas e executadas pola Xunta de Galicia.


- c) Potenciar a transparencia e mellora da xestión do sector, desenvolvendo unha estratexia de calidade e responsabilidade das organizacións, así como recompilando e transferindo as boas prácticas identificadas.
- e) Facilitar a participación das persoas en risco de pobreza ou exclusión social nas entidades membro e diante das diversas administracións públicas.
- f) Sensibilizar ao conxunto da sociedade e corresponsabilizar aos axentes clave, en particular Administracións Públicas e empresas, sobre as cuestións relativas á inclusión social a través de diferentes iniciativas, como a responsabilidade social corporativa.

SEGUNDO: Que para a consecución dos ditos fins lévanse a cabo as seguintes actividades, as cales se detallan na cláusula primeira, especialmente en tres liñas de actuación:

1. Sistema información compartida e traballo colaborativo e en rede:
 - a) O desenvolvemento de intranet con repositorio documentación e xestión de comunicación e formación interna.
 - b) O compartimento de información e boas prácticas con entidades membro e con outras redes autonómicas.



- c) O Plan de xestión de voluntariado.
 - d) A realización de estudos. No 2020 a Estratexia do Terceiro Sector de Acción Social Galicia e EAPN 2020-2023, Informe Vivenda en Galicia ou Estado de Pobreza en Galicia.
 - e) O aseguramento do mantemento e da seguridade informática.
 - f) O fomento do traballo en grupo, ben de xeito continuado (comunicación, participación, Fondos Estruturais, etc.) ou *ad hoc* (Ingreso Mínimo Vital, RISGA, IRPF, xénero, etc.).
2. Incremento da capacidade de investigación e propostas de mellora na loita contra a pobreza, exclusión social e servizos sociais:
- a) A consecución dos obradoiros de identificación das prioridades en servizos sociais e emprego 2018-2020 dende o Terceiro Sector Social galego durante o ano 2020.
A realización de informes-propostas en diversas materias: vivenda, xénero e feminización da pobreza, emprego, familias monoparentais e rendas mínimas (IMV, RISGA). No 2020 en especial, os de propostas do Terceiro Sector Social ante a nova lexislatura, Axenda Social de Galicia, Concerto Social ou proposta de Lei de Diálogo Civil de Galicia.
 - c) A organización de foros sobre pobreza, exclusión social e terceiro sector e voluntariado. No 2020, a mocidade como motor de transformación social, familias monoparentais, aporofobia, loita contra a pobreza no eido rural e outros.
 - d) A resposta ás demandas, consulta e diálogo coas administracións públicas, en especial da Xunta de Galicia.
 - e) Presenza activa e propositiva en órganos e foros sociais de interlocución no eido dos servizos sociais e o emprego como o Consello de Benestar, Economía Social, Voluntariado ou mesmo o Plan Estratéxico de Galicia 2021-2030.
3. Aumento da capacidade comunicación interna e externa para difusión da mensaxe de defensa dos dereitos das persoas en situación ou risco de pobreza e exclusión, especialmente a través das mesmas:
- a) O mantemento dun Grupo de comunicación operativo.
 - b) O desenvolvemento do plan de comunicación externa e interna (medios de comunicación e Social Media). No 2020 implicará campañas como a da X Solidaria do IRPF, Contra aporofobia, #PobrezaGalicia e #EuSiVoto polas eleccións autonómicas ou en defensa das rendas mínimas como a RISGA.





- c) A realización de seminarios, acompañamento, deseño e implantación da campaña de comunicación (redes sociais e medios de comunicación). En especial as adicadas a combater os “prexuízos, estereotipos, intolerancia e ata desprezo ás persoas en risco de pobreza ou exclusión” como instou por unanimidade o Parlamento de Galicia. No 2020 implicará seminarios sobre fomento de narrativas alternativas contra discurso do odio ou de formación básica para persoal administrativo xunto á EGAP, así como impulso ás Oficina de Atención as Vítimas.
- d) A organización do Encontro de participación das persoas en risco de pobreza e exclusión. No 2020 ademais inclúe a organización da visita do relator da ONU sobre pobreza extrema e dereitos humanos xunto á Valedora do Pobo de Galicia.
- e) A celebración do Día da Xustiza Social (20 de febreiro) e do Día de Erradicación da Pobreza (17 de outubro).
- f) Facilitar comunicación externa e interna coas organizacións que conforman o Terceiro Sector de Acción Social galego, co impulso do Boletín "EnRedeSocial" como único medio de información sobre novas de servizos sociais e loita contra a pobreza.



4. A emerxencia social motivada polo COVID-19 obriga no 2020 a reformular actividades xa previstas e a realizar outras novas, destacando as seguintes:

- a) Web específica para entidades e cidadanía.
- b) Consulta a entidades e informes sobre necesidades e propostas para a Xunta de Galicia e o Centro de Coordinación Operativa (CECOP).
- c) Infografía de apoio entidades en problemáticas de confinamento.
- d) Impacto da fenda dixital. Consulta, seminario (“Fenda Dixital: O exercicio dos dereitos en tempos de confinamento”) e informe de situación e propostas.
- e) Adaptación telemática e comunicación (Zoom, teletraballo, etc.).
- f) Estudo e xornada sobre a tarxeta moedeiro básica.

TERCEIRO: Que a Consellería de Política Social, conforme co Decreto 176/2015, do 3 de decembro, é o órgano que ten asumidas as competencias en materia de servizos sociais, incluíndo servizos comunitarios, as políticas de inclusión social e en favor da poboación inmigrante que lle corresponden á Xunta de Galicia.

CUARTO: Que no exercicio destas competencias considérase esencial desenvolver unha liña de colaboración a través da subscripción dun convenio con EAPN-Galicia, a través da concesión dunha subvención pública, para o desenvolvemento das actuacións tendentes á





coordinación, optimización dos recursos e sinerxias de actuacións das entidades integrantes que teñen como finalidade a loita contra a pobreza e a exclusión social descritas no expoñendo segundo.

A instrumentación desta axuda por medio dun convenio de colaboración singular reside na circunstancia de que os estatutos de EAPN-Galicia configúranse como a única que ten por obxecto a incidencia no deseño de novas políticas e prácticas que contribúan á defensa dos intereses das persoas en situación de pobreza e exclusión social, provocando cambios que optimicen os procesos de inclusión social en Galicia, e a única na que se establece que poderán ser membros da mesma todas as persoas xurídicas sen ánimo de lucro involucradas na loita contra a pobreza e a exclusión social definida de acordo co establecido no artigo 3.1 da Lei 10/2013, do 27 de novembro, de inclusión social de Galicia. Neste sentido, hai que ter en conta que esta entidade non pode participar nas convocatorias de subvencións de inclusión social, dado que non presta servizos directos ás persoas, senón que apoia ás entidades representantes das persoas vulnerables que conectan os seus esforzos para conseguir sinerxias e crear unha plataforma que canalice e dea voz ás demandas do sector. De acordo con isto, a Consellería de Política Social considera que a colaboración no mantemento das actuacións descritas nos fins de EAPN-Galicia cumpre, indubidablemente, unha función de interese social en consonancia co establecido no artigo 19.4.c) da Lei 9/2007, do 13 de xuño, de subvencións de Galicia e no artigo 40 do seu regulamento, aprobado polo Decreto 11/2009, do 3 de xaneiro.

CLÁUSULAS

PRIMEIRA. Obxecto e contido

É obxecto do presente convenio a colaboración entre a Consellería de Política Social e EAPN-Galicia para a realización, por parte desta última, dunha serie de actuacións encamiñadas á coordinación, optimización dos recursos e sinerxias de actuacións das entidades integrantes que teñen como finalidade a loita contra a pobreza e a exclusión social.

A colaboración regulada neste convenio entre a Consellería de Política Social e EAPN-Galicia centrarase no financiamento das actividades que aseguren a unión de esforzos, a creación de sinerxias e o incremento da eficacia e a eficiencia das actuacións das súas entidades membro, coas seguintes finalidades:





- a) A creación de grupos de traballo, tanto estables como *ad hoc*, establecendo protocolos e calendarios de realización das xuntanzas, con implicación de persoas expertas e das entidades membro. Inclúe a realización de actividades como:

Grupos *ad hoc*: Convocatoria IRPF, Emprego (Convocatorias *Coopera e Posta a punto para o emprego*) ou Xénero (seguimento, documento Principios de perspectiva de xénero EAPN-Galicia).

Grupos de Traballo de Comunicación, Participación.

Estratexia Terceiro Sector de Acción Social Galicia e EAPN 2020-2023.

- b) A garantía dunha presenza activa e propositiva nos diversos foros sociais e políticos responsables do asesoramento e supervisión das políticas públicas do ámbito social en Galicia. Inclúe a realización de actividades como:

Propostas Inclusión: IMV, RISGA, nova lei garantía ingresos.

Plan contra loita pobreza en Familias Monoparentais. Presentación.

Propostas Emprego: Convocatorias *Coopera e Posta a punto para o emprego*.

Reforzo da asesoría xurídica EAPN Galicia.

FEGAMP. Elaboración de protocolo de relación e actividades conxuntas concellos e TSAS.

Informe emendas ao Decreto de Concerto Social en Lei de Servizos Sociais.

Informe Vivenda en Galicia 2020.

Eleccións Autonómicas 2020.

Axenda Social de Galicia 2020.

Día da Erradicación da Pobreza: Informe Estado Pobreza 2020.

Proposta de Lei do Diálogo Civil de Galicia.

Plan Estratéxico de Galicia 2021-2030. Mesas de inclusión social e igualdade, e familia e benestar.

Consello de Economía Social de Galicia. Difusión entidades economía solidaria.

COVID-19. Consulta a entidades e informes de necesidades e propostas para a Xunta de Galicia e o Centro de Coordinación Operativa (CECOP).

COVID-19. Estudo e xornada sobre tarxeta moedeiro básica.

- c) O incremento da participación democrática e a incidencia social e política dos galegos e galegas en risco de pobreza e exclusión social. Inclúe a realización de actividades como:

Xornadas Mocidade como motor de transformación social.

Valedoría do Pobo. Elaboración propostas e protocolo actuación.

Informe comisións bancarias a receptoras prestacións.

Organización visita relator ONU pobreza extrema e dereitos humanos.

XI Encontro de Participación.



CF G-70 209.549



Seminarios Pobreza e Exclusión social (Monoparentais Euskadi, Concello Lugo, Traballo Social, pobreza rural...).

COVID-19. Impacto fenda dixital. Consulta, seminario (“Fenda Dixital: O exercicio dos dereitos en tempos de confinamento”) e informe con situación e propostas.

- d) Facilitar a comunicación interna e externa e o recoñecemento das organizacións de iniciativa social do Terceiro Sector Social galego e fomento do diálogo civil coas Administracións públicas galegas. Inclúe a realización de actividades como:

Campaña X Solidaria IRPF 2020.

Campañas comunicación #ContrAporofobia #MentirasPobreza #PobrezaGalicia #EuSiVoto #ContraPobreza #MalditaBurocracia #RentaMinimaSi.

Boletín “EnRedeSocial” 26 edicións.

COVID-19. Web específica para entidades e cidadanía.

COVID-19 Infografías apoio entidades en problemáticas confinamento.

COVID-19. Adaptación telemática e comunicación (Zoom, teletraballo, etc.).

- e) Fomentar iniciativas conxuntas entre organizacións de iniciativa social e Administracións públicas de formación e difusión de ferramentas sobre: construción discurso, tolerancia e loita contra aporofobia, discurso do odio e desinformación cara calquera colectivo en risco de vulnerabilidade, así como de apoio as súas vítimas. Inclúe a realización de actividades como:

Seminario. Fomento narrativas alternativas contra discurso do odio .

Seminarios prexuízos e aporofobia: EGAP, centros educativos.

Desenvolvemento e coordinación coas Oficinas Atención as Vítimas.

Ficha comunicación inclusiva e discurso alternativo contra o odio.

SEGUNDA. Obrigas de EAPN-Galicia

EAPN-Galicia asume as obrigas sinaladas no artigo 11 da Lei 9/2007, do 13 de xuño, en especial, acepta os seguintes compromisos como consecuencia da sinatura deste convenio:

- a) Realizar as accións subvencionadas en virtude do presente convenio.
- b) Acreditar a realización do obxecto así como a aplicación dos fondos ao fin destinado de acordo co establecido na cláusula quinta deste convenio.
- c) Cumprir os requisitos e non atoparse incurso en ningunha das circunstancias e prohibicións establecidas no artigo 10 da Lei 9/2007, do 13 de xuño.





- d) Acreditar documentalmente, antes da sinatura do convenio e do pagamento, no caso de oporse expresamente á consulta pola Administración, o cumprimento das obrigas tributarias e fronte á Seguridade Social e o non ter pendentes débedas coa Comunidade Autónoma nin ser debedora por resolución de procedencia de reintegro, ao abeiro do artigo 28 da Lei 39/2015, do 1 de outubro, do procedemento administrativo común das administracións públicas.
- e) Comunicar a obtención doutras subvencións, axudas, ingresos ou recursos que financien as accións derivadas do obxecto do convenio. Esta comunicación deberá efectuarse tan pronto como se coñeza e en todo caso con anterioridade á xustificación da aplicación dada aos fondos percibidos.
- f) Facilitar as actuacións de comprobación e subministrar a información, requirida pola Consellería de Política Social, a través do órgano directivo competente en materia de inclusión social, encargado da xestión do convenio, e do órgano competente en materia de inspección nas áreas de servizos comunitarios e inclusión social, así como pola Intervención Xeral da Comunidade Autónoma, o Consello de Contas e o Tribunal de Contas, no exercicio das súas funcións de fiscalización e control. Para os efectos de comprobación administrativa, a sede de EAPN-Galicia está situada en Santiago de Compostela, na rúa Basquiños núm. 33, 1ªA, e todas as peticións de documentación deberán dirixirse a esta para acadar maior operatividade.
- g) Adecuar a forma de presentación dos datos relativos á execución das accións, así como os instrumentos xustificativos do gasto, á Lei 9/2007, do 13 de xuño, e á Lei 39/2015, do 1 de outubro.
- h) Informar á Consellería de Política Social, a través do órgano directivo competente en materia de inclusión social, do funcionamento das actuacións obxecto do convenio.
- i) Adoptar as medidas de difusión contidas no artigo 15.3 da Lei 9/2007, do 13 de xuño, e no 20 do seu regulamento, aprobado polo Decreto 11/2009, do 8 de xaneiro. Estas medidas consistirán na inclusión da imaxe institucional da Xunta de Galicia así como en lendas alusiva ao financiamento público do programa en carteis, placas, materiais impresos e medios electrónicos e audiovisuais, entre outros, que teñan relación co programa subvencionado.





- j) Levar un arquivo e custodia, durante, polo menos, cinco anos, da documentación substantiva e financeira que soporte e acredite a realización das accións obxecto deste convenio. En particular, EAPN-Galicia comprométese a achegar inescusablemente nun prazo de dez días cantas facturas, nóminas e demais documentos de carácter contable lle sexan requiridos pola Consellería de Política Social, a través do órgano directivo competente en materia de inclusión social.
- k) Proceder ao reintegro dos fondos percibidos nos supostos contemplados nos artigos 32 e 33 da Lei 9/2007, do 13 de xuño.
- l) Cumprir cantas outras obrigas se deriven da execución do disposto neste convenio.

TERCEIRA. Orzamento

A concesión das subvencións reguladas neste convenio terá como límite global o crédito asignado para estes fins na Lei 6/2019, do 23 de decembro, de orzamentos xerais da Comunidade Autónoma de Galicia para o ano 2020, na aplicación 2020.13.03.312A.481.3, polo importe global de CORENTA E SEIS MIL EUROS (46.000,00 €), sen prexuízo de posteriores variacións producidas como consecuencia das modificacións orzamentarias.

CUARTA. Gastos subvencionables

A condición de imputable do gasto deriva do cumprimento dos seguintes requisitos: que sexa un gasto directo da acción; que de xeito indubidable responda á natureza do programa subvencionado; que sexa axeitado aos obxectivos da medida á que pertence; que exista constancia documental sobre a súa realización de xeito verificable e que se realice dentro da anualidade 2020; que se acredite mediante facturas ou documentos de valor probatorio equivalente con validez no tráfico xurídico mercantil ou con eficacia administrativa, e que sexa efectivamente pagado pola entidade beneficiaria dentro do prazo de xustificación, agás que se trate de gastos correspondentes a impostos ou cotas por seguros sociais relativos a gastos directos da acción liquidables con posterioridade a esta data; neste caso, o período subvencionable excede do prazo de xustificación e abrangue ata o derradeiro día do mes seguinte ao último trimestre do exercicio en que se establece a axuda.

Poderán financiarse con cargo a este convenio gastos correntes consumibles non amortizables necesarios para a realización da actividade, tales como:

- a) Gastos de persoal.



- b) Aluguer (incluídos gastos de comunidade).
- c) Combustible e outros gastos de desprazamento.
- d) Seguros: vehículos, voluntarios e locais.
- e) Material de oficina non inventariable.
- f) Mantemento e material de reposto de máquinas, instalacións e equipos.
- g) Teléfono e enerxía eléctrica.
- h) Gastos de publicidade, sensibilización, consultoría, formación e asesoría externa.
- i) Gasto destinado a cubrir o aumento de consumo de datos na conexión á Internet das persoas participantes que estean en situación de pobreza ou exclusión social, definida conforme o artigo 3 da Lei 10/2013, do 27 de novembro.

Estes gastos serán subvencionados coa condición de que correspondan a custos reais de execución da actividade financiada polo convenio e se asignen de forma rateada á operación, de acordo cun método equitativo debidamente xustificado.

Non se poderán financiar os gastos que supoñan calquera tipo de investimento en bens inventariables.

QUINTA. Forma de xustificación e pagamento

Respecto da forma de xustificación e pagamento estarase ao disposto na Lei 2/2018, do 26 decembro, ao establecido na Lei 9/2007, do 13 de xuño, e no regulamento desta última, aprobado polo Decreto 11/2009, do 8 de xaneiro.

- 2. O pagamento efectuarase previa presentación dos documentos xustificativos de gasto que permitan acreditar o cumprimento do obxecto do convenio.
- 3. A data límite de xustificación, para os efectos do artigo 37.2.e) do Decreto 11/2009, do 8 de xaneiro, é o 14 de decembro de 2020. Non obstante, o órgano xestor do convenio poderá esixir a acreditación da xustificación da subvención con anterioridade e en función do que, no seu día, dispoña a norma que regula as operacións de pechamento do exercicio 2020.
- 4. En aplicación do artigo 29.2 da Lei 9/2007, do 13 de xuño, e do artigo 42 do Decreto 11/2009, do 8 de xaneiro, considérase gasto realizado o que foi efectivamente pagado con anterioridade á data de finalización do período de xustificación, acreditándose este pagamento mediante extractos ou certificacións bancarias debidamente identificados, selados, e asinados pola entidade beneficiaria.
- 5. O pagamento poderá facerse efectivo mediante libramentos parciais á conta da liquidación definitiva, ata o 80% da contía total concedida, a medida en que EAPN-Galicia xustifique os gastos realizados e o cumprimento da finalidade para a que foi concedida a axuda, así como a aplicación dos fondos destinados para estes efectos. Estes libramentos parciais





quedarán exonerados da constitución de garantías previstas no artigo 67 do Decreto 11/2009, do 8 de xaneiro, por estar incluídos no suposto recollido no apartado f) do artigo 65.4.

SEXTA. Documentación para xustificar as axudas

A xustificación dos libramentos parciais realizarase mediante a presentación de:

- a) Unha relación clasificada dos gastos da actividade, con identificación da persoa acreedora e do documento xustificativo do gasto, o seu importe, a data de emisión e, se é o caso, a data de pagamento.
- b) Facturas ou documentos de valor probatorio equivalente no tráfico xurídico mercantil ou con eficacia administrativa incorporados na relación á que se fai referencia no parágrafo anterior e a documentación acreditativa do seu pagamento.
- c) A respecto do gasto destinado a cubrir o aumento de consumo de datos na conexión á Internet das persoas participantes que estean en situación de pobreza ou exclusión social, ademais do recibo asinado da cantidade recibida, hai que acreditar tal situación, deste xeito:
 - As persoas beneficiarias de Pensión non Contributiva achegarán certificación de seren beneficiarias.
 - As persoas beneficiarias da Renda de Integración Social de Galicia ou de Axudas de Inclusión Social achegarán certificación de seren beneficiarias.
 - As restantes persoas achegarán certificación da situación ou risco de exclusión social expedida polos servizos sociais comunitarios básicos do concello de residencia.

Antes de facer efectivo o 20% restante, EAPN-Galicia deberá presentar a seguinte conta xustificativa:

- a) Memoria de resultados que recolla as actuacións realizadas obxecto deste convenio.
- b) Memoria económica xustificativa do custo das actividades realizadas, que conterá os mesmos elementos descritos no apartado dedicado aos libramentos parciais e ademais estes outros:
 - Balance en que se reflicta a totalidade dos ingresos e gastos correspondentes á actividade obxecto do convenio.



- Declaración que conteña unha relación detallada doutros ingresos ou subvencións que financiasen a actividade subvencionada con indicación do importe e a súa procedencia.
- Declaración responsable que acredite a finalización das actividades programadas.

SÉTIMA. Obtención doutras axudas

1. Toda alteración das condicións tidas en conta para a celebración deste convenio e, en todo caso, a obtención concorrente de subvencións ou axudas outorgadas por outras administracións ou entes públicos ou privados, nacionais ou internacionais, poderá dar lugar á modificación das condicións establecidas no presente convenio.
2. O importe da subvención non poderá en ningún caso ser de tal contía que, illadamente ou en concorrencia con subvencións ou axudas ingresos ou recursos doutras administracións públicas supere o custo das accións derivadas do convenio. Como regra xeral, permítese a acumulación de axudas, sempre que o importe total destas non supere o custe total do programa. Para tal fin, establecerase un sistema de estampillado dos xustificantes de gasto que permita o control da concorrencia de subvencións, con expresión da porcentaxe que se lle imputa, ben a totalidade ou a que lle corresponda.



ÓTAVA. Comisión de seguimento

Créase unha Comisión Mixta paritaria para a avaliación e seguimento das accións estipuladas, que estará integrada por dúas persoas en representación do órgano directivo competente en materia de inclusión social da Consellería de Política Social e dúas persoas en representación de FEGABAN, e cuxa presidencia e secretaría recaerán, respectivamente, nas persoas representantes do citado órgano directivo.

As persoas titulares da presidencia, da secretaría e as demais persoas que integran a comisión poderán ser suplidas temporalmente nos supostos de vacante, ausencia ou enfermidade, polas persoas que designe o órgano competente para o nomeamento daquelas.

O seu réxime xurídico estará regulado pola Lei 40/2015, do 1 de outubro, do réxime xurídico do sector público, e pola Lei 16/2010, do 17 de decembro, de organización e funcionamento da Administración xeral e do sector público autonómico de Galicia.

A Comisión Mixta velará polo cumprimento dos obxectivos fixados no convenio e resolverá os problemas de interpretación do convenio que poidan xurdir.



NOVENA. Inexistencia de relación laboral

A subscripción deste convenio non implicará relación contractual ningunha entre a Consellería de Política Social e as persoas que desenvolvan as actividades que constitúen o obxecto daquel, de xeito que por este concepto non se lle poderá esixir responsabilidade ningunha, ni directa nin subsidiaria, polo acontecido no desenvolvemento do convenio.

DÉCIMA. Duración

A vixencia do presente convenio estenderase desde a data da súa sinatura ata o día 31 de decembro do ano 2020.

Non obstante, financiaranse os gastos realizados que cumpran as condicións indicadas na cláusula cuarta deste convenio, realizados dende o 1 de xaneiro do actual exercicio.

DÉCIMO PRIMEIRA. Causas de resolución e reintegro

1. Serán causas de resolución do convenio e darán lugar, no seu caso, ao reintegro das cantidades percibidas, incrementadas cos xuros legais establecidos de acordo coa normativa vixente:

- a) O transcurso do prazo de vixencia do convenio sen que se acordara a súa prórroga.
- b) O acordo unánime das partes asinantes.
- c) O incumprimento das obrigas e compromisos asumidos por algunha das partes.

Neste caso, calquera das partes poderá notificar á parte incumpridora, un requirimento para que cumpra nun determinado prazo coas obrigas ou compromisos que se consideran incumpridos. Este requirimento será comunicado ao responsable da comisión de seguimento do convenio.

Se transcorrido o o prazo indicado no requirimento, persistise o incumprimento a parte que o dirixiu notificará á outra parte a existencia da causa de resolución e entenderase resolto o convenio, sen que isto xere dereito a indemnización.

- d) A aplicación dos fondos outorgados no convenio para fins distintos do que motivaron a súa concesión.
- e) A falta de xustificación do emprego das cantidades recibidas, ou a falsidade de datos achegados para esta fin.
- f) Por decisión xudicial que declare a nulidade do convenio.
- g) Por calquera outra causa distinta das anteriores prevista na lexislación vixente.



2. Aos efectos de reintegro das subvencións estarase ao disposto no título II da Lei 9/2007, do 13 de xuño, e no seu regulamento, aprobado polo Decreto 11/2009, do 8 de xaneiro.

DÉCIMO SEGUNDA. Carácter administrativo do convenio

O presente convenio terá carácter administrativo, rexéndose os seus efectos polo establecido nas súas cláusulas e no non previsto aplicaráselle os principios contemplados na Lei 9/2017, do 8 de novembro, de contratos do sector público, pola que se transpóñen ao ordenamento xurídico español as Directivas do Parlamento Europeo e do Consello 2014/23/UE e 2014/24/UE, do 26 de febreiro de 2014, para resolver as lagoas e dúbidas que puidesen presentarse. Así mesmo, rexeráse tamén pola Lei 40/2015, do 1 de outubro, pola Lei 38/2003, do 17 de novembro, xeral de subvencións, pola Lei 9/2007, do 13 de xuño, e polo Decreto 11/2009, do 8 de xaneiro.

A Administración gozará de todas as prerrogativas inherentes á natureza administrativa do convenio.

DÉCIMO TERCEIRA. Cuestións litixiosas

1. As cuestións litixiosas xurdidas acerca da interpretación, modificación ou efectos do convenio serán resoltas pola Consellería de Política Social poñendo os seus acordos fin á vía administrativa.
2. Contra estes acordos cabe interpoñer recurso potestativo de reposición, no prazo dun mes ante o mesmo órgano que ditou a resolución, segundo o previsto na Lei 39/2015, do 1 de outubro; ou poderá interpoñerse directamente ante o Tribunal superior de Xustiza de Galicia, recurso contencioso-administrativo, no prazo de dous meses contados desde o día seguinte ao da notificación do acto que poña fin á vía administrativa, se fose expreso. Se non o fora, o prazo será de seis meses e contarase, para o solicitante e outros posibles interesados, a partir do día seguinte a aquel en que, de acordo coa súa normativa específica, se produza o acto presunto, de conformidade co disposto na Lei 29/1998, do 13 de xullo, reguladora da xurisdición contencioso-administrativa.

DÉCIMO CUARTA. Transparencia e publicidade

Este convenio será obxecto de publicidade e inscrición de conformidade co disposto no artigo 15 da Lei 1/2016, do 18 de xaneiro, de transparencia e bo goberno e no Decreto 126/2006, do 20 de xullo, polo que se regula o rexistro de convenios da Xunta de Galicia.

Así mesmo, a concesión da subvención será obxecto de publicación e inscrición en cumprimento do disposto no artigo 17 da lei 1/2016, do 18 de xaneiro, o artigo 15 da Lei 9/2007, do 13 de xuño, e no Decreto 132/2006, do 27 de xullo, polo que se regulan os





registros públicos creados nos artigos 44 e 45 da Lei 7/2005, do 29 de decembro, de orzamentos xerais da Comunidade Autónoma de Galicia para o ano 2006.

As partes asinantes autorizan a publicidade dos seus datos persoais e demais especificacións recollidas no presente convenio de colaboración no Portal da Transparencia e Goberno Aberto.

De conformidade coa Lei 38/2003, do 17 de novembro, o convenio de colaboración e a información sobre a subvención serán comunicados á Base de Datos Nacional de Subvencións (BDNS).

Como beneficiaria de subvención pública ao abeiro deste convenio, EAPN-Galicia obrígase a subministrar á Administración, previo requirimento, toda a información necesaria para que esta última poida cumprir coas obrigas previstas no Título I da Lei 1/2016, do 18 de xaneiro, coas consecuencias, no caso de incumprimento, indicadas no artigo 4 da devandita lei.

DÉCIMO QUINTA. Información básica sobre protección de datos persoais

Os datos persoais recabados neste procedemento serán tratados na súa condición de responsable pola Xunta de Galicia, Consellería de Política Social coas finalidades de levar a cabo a tramitación administrativa que se derive da xestión deste procedemento.

O tratamento dos datos baséase no cumprimento dunha misión de interese público ou no exercicio de poderes públicos, conforme ás referencias recollidas en <https://www.xunta.gal/información-xeral-proteccion-datos>. Con todo, determinados tratamentos poderán fundamentarse no consentimento das persoas interesadas, reflectíndose esta circunstancia no propio convenio.

Os datos serán comunicados ás Administracións públicas no exercicio das súas competencias, cando sexa necesario para a tramitación e resolución dos seus procedementos ou para que os cidadáns poidan acceder de forma integral á información relativo a unha materia. Especificamente os datos serán comunicados ao órgano responsable da BDNS, a Intervención Xeral da Administración do Estado, coa finalidade da promoción da transparencia, a planificación das políticas públicas, a xestión e colaboración na loita contra o fraude de subvencións e axudas públicas.

A referencia a publicidade, en cumprimento da normativa de transparencia e de subvencións, axustarase a dita normativa e coas limitación que esta establece.

As persoas interesadas poderán acceder, rectificar e suprimir os seus datos, así como exercitar outros dereitos ou retirar o seu consentimento, a través da sede electrónica da Xunta de Galicia ou presencialmente nos lugares e registros establecidos na normativa reguladora do procedemento administrativo común, segundo se explicita na información adicional recollida en <https://www.xunta.gal/informacion-xeral-proteccion-datos>.






As partes asinantes deste convenio garantirán a confidencialidade dos datos persoais aos que teñan acceso como consecuencia das actuacións realizadas en execución deste e de conformidade co disposto na Lei orgánica 3/2018, de 5 de decembro, de protección de datos persoais e garantía dos dereitos dixitais e no Regulamento (UE) 2016/679 do Parlamento europeo e do Consello do 27 de abril de 2016, relativo á protección das persoas físicas respecto ao tratamento de datos persoais e á libre circulación deses datos e que derroga a Directiva 95/46/CE (Regulamento xeral sobre a protección de datos).

E en proba de conformidade cos termos do convenio, as partes asínano e rubrícano, por triplicado, no lugar e na data indicados na cabeceira.

A conselleira de Política Social


Fabiola García Martínez


A presidenta de EAPN-Galicia


Eloina Ingerto López
